

Coordinado nacional Mr. Drs. Jeannette Richardson-Baars:

Habri wowo pa traficacion y contrabanda di hende

ORANJESTAD- Diadomingo awo dia 18 di October 2015 ta 'Dia Nacional contra Traficacion y Contrabanda di Hende'. Riba e dia aki, Task force di Aruba contra Traficacion y Contrabanda di Hende ta pidi comunidad pa para keto un rato y puntra si traficacion di hende ta sosode na Aruba.

Pero, kico ta traficacion di hende? Traficacion di hende ta un forma di esclavitud moderno. E traficantenan ta haci negoshi cu otro hende, adulto y muchanan, den nan pais mes of pafo di nan pais cu e meta di explotacion, pues pa gana placa, placa y mas placa.

E traficantenan ta aparece dilanti bo como un bon persona, bo miho amigo cu por yuda bo cu bo situacion, como e miho doño di trabou, cu hopi promesa y speranza pa un miho bida, cu ta pone hende cay facil den nan trampa. Una bes den e trampa ta dificil pa sali.

E explotacion aki por sosode dor di uza e hende(1) como un esclavo sexual den prostitucion sea den barnan, na casnan priva of den "escort services", (2) como un trahado



barata sea den construcccion, den un supermercado, den un tienda of den un cas priva pa servicio domestico.

Traficacion di hende ta un violacion di dignidad y integridad di e ser humano. Un ser humano no ta un cos pa haci negoshi cun'e!

Mayoria biaha bo no ta nota ni ripara nada. E victima of miho bisa, e esclavo moderno, hopi biaha no mag of no ta tripi di papia y bisa algo, pasobra esey lo tin con-

secuencia pe of su famia.

Nan ta kita su paspoort, cu ta haci cu e no por move liber, of otro papelnan importante manera permiso. Por tin situacionnan di maltrato y abuso di e victima, pa e yega e punto cu e no ta tripi di keha of busca ayudo. E ta sosode mas cu hende muhe y mucha, pero esaki no ta exclui cu e ta sosode tambe cu hende homber.

Traficacion di hende ta sosode na Aruba tambe, pero hopi di nos no sa cu ta trata di

traficacion di hende. Ta sosode den un forma cu bo no ta ripara mes y tin biaha bo ta promoviendo traficacion di hende sin bo ta realiza bo mes, por ehempel dor di (1) cumpra cosnan barata cu a wordo produci dor di mucha esclavo na un otro pais, (2) uza e servicionan sexual di muhenan di bida sin sa si e persona ta haci esey di su mes un boluntad of (3) laga hende traha pa bo sin paga e suma correspondiente y corecto pa e trabou ey.

P'esey na aña 2011 e Taskforce a lansa un campaña di conscientisacion 'Habri bo wowo pa traficacion di hende' pidiendo cooperacion di comunidad completo. Ta nos tur mester ta alerta y observa bon! Si ta sospecha algo por yama na e number di telefon di e Hotline pa Traficacion di Hende: 592 3231 cu ta 24 ora pa dia activo y disponibel.

Tambe Taskforce ta sigui duna informacion over di e fenomeno aki na pueblo en general y na departamentonan di Gobierno, pa tur hende ta mas consciente. Pa mas informacion over di Traficacion di Hende y kico bo por haci, por manda un e-mail na LCMM@kparuba.com of check Facebook 'Counter Trafficking Taskforce Aruba'.

E aña aki Taskforce contra Traficacion y Contrabanda di Hende ta bay duna informacion y splicacion amplio over di e problematica aki na tur klas di examen di EPI y di Colegio Arubano. Hobennan creciendo mester ta consciente di traficacion di hende, pa asina nan no bira victima di e traficantenan, sea na Aruba of na e pais cu nan ta bay sigui nan estudio. Mayornan y hobennan habri boso wowo!! ☐